

محمد فارس أبو عمار

حُكْمُ السَّتِّ

أشعار عامية

طبعة أولى ٢٠١٨

بطاقة الكتاب

عنوان المؤلف : حُكم السِّتّ
المؤلف : محمد فارس أبو عمار
التصنيف : أشعار بالعامية
رقم الإيداع : 5197 - 2018
عدد الصفحات : 100 صفحة
رقم الإصدار الداخلي : 147
تاريخ الإصدار الداخلي : فبراير 2018 طبعة أولى
تصميم الغلاف والتنسيق : دار النيل والفرات للنشر والتوزيع

جميع حقوق الطبع والنشر محفوظة للشاعر، ولا يحق لأى دار نشر
طبع ونشر وتوزيع الكتاب الا بموافقة كتابية وموثقة من الشاعر

دار النيل والفرات للنشر والتوزيع

سجل تجارى : 13242
بطاقة ضريبية : 165-5-00031-572-01-35
رقم التسجيل : 2017-7 544-662-202
E-mail: alnile waalforat@yahoo.com
twitter: النيل والفرات
youtube: alnile waalforat@yahoo.com
facebook: alnile wa alforat

هاتف : 01011256943 - 01116202218 - 01202541192

الشرقية - العاشر من رمضان - مجاورة ١٣ - عقار ٣٠٤ - الدور الثاني - أمام سنتر ١٣



الإهداء

- إلى والدي رحمه الله رحمة واسعة
- إلى والدتي حفظها الله وقد كتبت لها كلمات متواضعة
- إلى زوجتي التي قدمت لي ولأبنائي كل العون والجهد
- إلى أبنائي : شيماء ومحمود وإسراء
- ولأحفادي : مصطفى ومحمود
- وإلى أستاذي ابن عمي وأخي / عبدالحميد فارس رحمه الله
الشاعر العملاق عضو / جماعة رابطة الأدب الحديث
- وصاحب ديوان وجدان شاعر وهو أول من فتح لي طريق
كتابة الشعر وشجعتني عليه
- واليهم أهدى الإصدار الأول لي
- وأخيرا أتوجه بالشكر إلى الأخت الشاعرة / منى الغريب
التي تعاونت معي في تنسيق وإخراج هذا الديوان
- الشاعر / محمد فارس أبو عمار

ذنبه إيه

يامحسوب ع البني أدمين

فين الرحمة و فين الدين

ألف قاف .. ألف قاف

نص الكلمة من حرفين

لو ح تفكر مرة تقولها

حتمًا تبقى شريك القاتل

تبقى كمان ع القتل معين

واوعى تقول ده باسم الدين

يامحسوب ع البني أدمين

....

طب ذنبه إيه .. وعملك إيه

طفل يعيش محروم ويتيم

أمه هناك ف رحاب مولاها

ذنبه إيه فى اليتم ضناها
تقتل ليه ؟ ولصالح مين؟
يامحسوب ع البني آدمين

....

لَمَّا الرحمه تموت مع قلبك
راح تلاقىها ف قلب بهيم
تقتل تشرب دم اخواتك
شاب يروح و ف عز شابه
تحرم أهله ليه بغيا به
طب مش يمكن هو عائلهم
ولا وراه أولاد بيعولهم
ليه تقتلهم باسم الدين
يامحسوب ع البني آدمين

....

أيها دين بيقولك تقتل

تحصد ناس أرواحها بريئة
اللي بيحرس أرض بلاده
واللي بيسعى لأكل ولاده
واللي يقيم الفرض عباده
ده اللي ادالك الفتوى غشيم
قال لك تقتل باسم الدين
يامحسوب ع النبي ادمين

....

ياللي بتظلم ياللي بتقتل
أيّ زمان أو أيّ مكان
طب فين أخلاقك يا إنسان
إحذر ذنبك وغضب ربك
لما يحاسبك يوم الدين
يامحسوب ع النبي أدمين

.....

عريس لقطة

كنت ح اجهز أوضة نوم
قولت كفاية علينا سرير
هو يادوب على قد نومتنا
لازمته إيه بس التبذير
يعنى عشان اكمنّى مدبر
قال بيقولوا عليا بخيل
بلا صالونات وستارة حرير
ماله كليم وإياس لحصير
والطبلية أحسن من غيرها
هيّ السفارة ومنها المكتب
ربّت ياما زمان مشاهير
يعنى عشان أكمنّى مدبر
قال بيقولوا عليا بخيل

والتلاجه مافيش داعى منها
لا..بيقولوا ضررها كثير
ماله الشرب من الحنفية
فى المستقبل اجيب القله
وان فرجت راح اجيب الزير
يعنى عشان اكمنى مدبر
قال بيقولوا عليا بخيل
وايه يخلينى اروح الشركه
نشرب ميه..مع التعكير
أنا راح أدق طرمبة ف بيتنا
تجيب لى المية شديدة نقية
تبقى ثواب واهو منها سبيل
وأحسن من دفع الفواتير
يعنى عشان اكمنى مدبر
قال بيقولوا عليا بخيل

هو ضرورى نجيب بوتاجاز
ونشيل ليه همّ الأنابيب
على سهرايه ووابور جاز
ولمبه فتيل هاتنور بيتنا
وطشت غسيل موروث عن امى
كات وارثاه عن جدة ابوها
نلقى غسيلنا فل جميل
يعنى عشان اكمنى مدبر
قال بيقولوا عليا بخيل
لا وتقابل نايبة كبيرة
شبكة ومهر ذهب م الغالي
وحاجات تانيه ماجات على بالي
ماله ياخلق الذهب الصينى
ليه نطلع على طول في العالى
والمصاريف أولى بها عيالى

لو جه عيّل ولا اتنين
ولسّه ياهو مشوارنا طويل
يعنى عشان اكمنى مدبر
قال يقولوا عليا بخيل
لو كام لمبة على باب بيتنا
للي قُرَيْب واللي البعيد
كام زغروته هاتملا حارتنا
بلاها كهارب ولّا دي جي
والمعازيم تتغدى ف بيتهم
أكل الليل ع المعده تقيل
يعني عشان مانا قلبي عليكوا
تقوموا تقولوا عليا بخيل
....

سى روميو

سى روميو تحت البلكونة
لجل الشغالة تحنّ عليه
من ورا سيدها تجرى تقوله
واقف هنا بتنيل ايه
مستني انا منك نظراية
أو حتى تخنيلي بلقمة
أو تدينني ذكرى بيجامة قديمة
وكان يلبسها البيه
دا انا اللي باستناكي ليلا تي
ترمي لي نظرة كمان يا حياتي
من غيرك الدنيا دي مره
ما يحليها كريم شانتيه
= طب يلا بقى يجيلك دهوه

لا البيه يطب لنا على سهوه
يطردنا انا وانت لبره
يبقى عملت بحبك ايه
*وماتبقيش كده قاسية عليا
وبخيله قوي بالحنية
= يابنى روح شوفلك شغله
وبدل مابتستنى اللقمة
من واحدة زيي شقيانه
مهدودة ف شغلي وتعبانه
انا مهما كان واحده وليه
والشقى خد منى راقات
سايق لي فيها وتستهبّل
وعلى جوازنا بتستعجل
طب حيلتك ايه يامنيل
ياخويا روح اكل نفسك

بدل ماترمي عليا بلاك
ياتشوفلك شغله وتسترجل
ياتوريني لعرض قفاك
*عايزاني اقول ولا اخبي
الشغل ده انسي يا حبي
كفايه انا اخلف منك
وانتي بقى اصرفي ع البيت
=آخر زمن دا الرجاله
عايزين كده يعيشوا عواله
يلا بقى ارحل وفارقتي
ولا تعالى ابقى قابلي
امبارح الساعة ثلاثين
....

آخر صيحة

بحب الموضة
ياروحي ع الموضة
اموت انا والبس موضة
اديني الجينز المتقطع
وعليه الكاجول برموده
قطّع يامقطّع لبّسني
الجينز ده هوّ الى عاجبني
والموضه كمان بتشيكّني
فتحتها بتبين جسمي
شباب كتير جريوا ورايا
وكمان كتير عينهم مني
ومن بعيد شاب ندهلي
قال لي تعالي يابسكوته

قولت صحيح يبقى عجبته
مد إيديه و مسك إيدي
من غير كلام قولت موافقة
على انه خلاص راح يخطبني
قالي ح ناخذ حاجه ساقعة
ونروح البيت عندي شوية
وفرضت معاه حسن نيه
أتاريه كان ناوي على نيّة
واللى ف ايده كانت خمرة
فضلت أرقع انا بالصوت
اتلمت الناس حواليا
قالولوا يابني مالك بيها
قال دى مراتي غاليه عليا
عشان زعلانه منّي شويه
ح اخدها البيت لجل اصالحها

قولت دا كداب ابن لذينا
لا عمرى شوفته ولا عرفته
شافوا بطاقتى وبطاقته
طلع نصاب 100 المية
جات الشرطه وقبضوا عليه
طلع مسجّل حراميه
شافوا لبسي وتفوا عليه
قالوا تستاهلى يا غبيه
الحقنى يابا انا كنت ح اضيع
وفضل ربي اللي عصمني
لا عدت افكر في الموضه
دى الحشمه مافيش أحسن منها
ورجعت تانى استرنفسى
ولا حد ف مره يشوف جسمى

.....

يا أميره

كلامك بيزيد أشواقي

وسكاتك بيسيبيني ف حيرة

لوهمسك محسوب بالكلمة

انا ناوى ادفع لك بنديرة

آه منك آه يا أميرة

....

ياجميلة وياحسن بهاي

لغرامي كان إيه وداكي

وقعتي قلبي في هواكي

وجورتى على حق الجيره

آه منك آه يا أميرة

....

الليل ف عينيكي بقى نهار

خلّيتي قلبي بينهار
فى هواكى وبقيت محتار
ودلاك ماتقولش سفيرة
آه منك آه يا أميرة

.....

أميرة وجمال جذاب
لو شاورت تلقى الخطّاب
ولا ألفين واقفين ع الباب
اللي بيطمع له ف نظرة عين
واللى بيطلب له التأشيرة
آه منك آه يا أميرة

....

الجنة فى بعاذك نار
جرّيتي دموعي لأنهار
لو ينفع هاعملك زار

واديحكك جملين ف الشبكه

خليهم عربون تصبيرة

آه منك آه يا أميرة

....

كلمة راح اقولها وبصراحة

دي النظرة ف عينك دبّاحه

انا قلبي خلاص طب ف حبك

ولا ينفع أعمله جراحة

ولاينفع أربطله جبيرة

آه منك آه يا أميرة

....

ح اعملك محضر وقضية

اكنك عفواً حرامية

وسرقتي قلبي وعينية

وح اروح بالدعوة على سويسرا

وف كل محافل دولية
وح اقول ف الدعوة بصراحة
السرقه برقة وحنّة
والمسروق مني ده كان قلبي
ويبقى التعويض ليا أميرة
م الحب ويلغوا التسعيرة
آه منك آه يا أميرة

....

إنت مين

يعنى ليه مكتوب علينا

يوم عزا ويومين حداد

وقبل ماينتهوا

كاس المرار ينعاد

وكل يوم يروح عدد

بعديه كمان أعداد

ياشارب من دم البشر

فيه بينا لقا وميعاد

خلعت توب البشر

ماعدتش خلاص انسان

الشر بيك انتشر

ولبست لبس شيطان

ارحم تكالى حزانى

واطفال صغار أيتام
أهالي ولادنا اتلثموا
بالأسى والسواد
لو كنت صاحب دين
روح شوف عدوك فين
أنا مصري ايوه مصري
ممکن اعرف إنت مين؟!
....

حُكْمُ السَّتِّ

الست صحيح اللي بتحکم
والراجل قاعد مسكين
ماعليه غير يصرف أوياكل
وان قال يا شمال بتقوله يمين
ده لأن الكلمه اهي كلمتها
ماهي ليل نهار ويّا جارتها
وتبقى ليلته ماهيش فايته
إن قال عايز آكل ياولية
كل ساعه شخطه وناطره
وتقول على همك مش قادرة
نفسى ارتاح منك حبه
وعاملي زي غراب البين
قاعد ف البيت زي الكبّه

لا في فايده منك ولا عابدة
لا مساعد في شغل الشقة
ولامرہ حتى غسيل مواعين
ياناكرة كل خير مني
عايش معاكى غصب عني
قاسيه وعمرک ما تحنّي
جايبة الغدر ده كله منين
بكره تشوفي قيمة راجلك
وتعيشي في الدنيا لوحدك
لما الندم يوجع قلبك
ولا هايفيدك دمع العين

...

رسالة شهيد

من ابناء الصعيد

جايلك أنا يامّاي

بتوب منقوش على نعشي

أمانه عليكي يامّاي

لا تحزني وتبكي

لمي اخواتي وابوي

واقعدي اتعشي

انا كما النعسان

طلقة غدر يامّاي

سكنت هنا ف صدري

معقول يا خلق الله

مصري يقتل اخوه مصري

فى التو يامّاي شالوني

عشان ما قدرتش انا امشي

اطمّني يامّاي

ماشعرت بألم واصل

ولارمشت انا برمشي

وسط خلق كتيرزفوني

لاتقولي ولد ملك ولا أمير

ده غير سندس وحرير وكسّوني

الوصف كيف اوصفه يامّاي

دا الوصف خلاني

اقول ياريتني أعيش

وارجع شهيد تاني

أمانة عليكي يامّاي

ادّي عفشني وجهازي لاخويا

وقولي له مايز علشي

وقولي لعروستي كمان

ان جالك عريس زين
طوالي وافقي عليه ومشّي
عشان طلبوني خلق كتيرم السما
انا قولت حاضر وما اتأخرشي
امّاي انا فرحان
قابلوني خلق كتيرتاتين
بالورد والرياحين
والنياشين رقوني
وقالولي ان هونت على أهل الأرض
على أهل السما ماتهنوشي
كيف تجود بروحك وعمرك
واهل السما عليك ماتجودشي
أنا موتي بحكم القدر
ودمي ماراح هدر
والعيبة ع اللي غدر

هو اللي حظه شين

رسالتي ليكي ياماي

يقرولك اللي فيها

أم الشهيد تتهنى

والقاتل امه نعزيها

....

رنة تليفون

جاتني رنة من بئينه

دقة قلبي اتلخبطت

صوته عالي م اللي جرى لي

قلت له اسكت ساكت

التليفون صحى المدام

قولت يانهار مش فايت

روحت اتدارى في الدولاب

كأني بادور ع الجاكيت

جات ورايا تجري الهانم

واحد واحد اتسحبت

شخبطت فيا شخطة قوية

كل مفاصلي اتلبشت

عملت نفسي ماشي نايم

أخذت تليفوني واتصّنت
والست بشينة هات ياكلام
تسألني خلاص اتطلقت
ارمي عليها تلت طلقات
علشان تبقى اتأدبت
زعت فيا يا محروس
تعرف عليا واحده ست
أبدا ياروحي دي واحدة راجل
وأنا غلظت أما ردبت
مسكت ليا المنفضة
على روحي قوام اتشهدت
وهي قالت فين يوجعك
غصب عني ياحياتي
دي واحدة عليا اتصّنت
قالت كفن جدي اللي متشاله

مايغلاش على جتتك
فزعت ف بشينه وصوتت
اقرى الفاتحة ع المرحوم
بعد أما يصحى من النوم
عشان حياته كده انتهت
أيوه حياته كده انتهت

جواز اضطرارى

متجوز الولية
وبناتها عليها هدية
يمسك إيد داهية
ويطبطب على دية
قال يعني دي حنية
وهما بحسن نيه
عيب دول زي بناتك
ويمكن من دوراخوانك
ما تغفلش الولية
آمنتك على بناتها
ووثقت فى كلامك
قالت تخاف عليهم
اكنك زى ابوهم

اتاريك تغلب خاين
عايز تغرر بيهم
قايم بالليل تتسحب
على غرفة البنات
بدل ما تحميهم
رايح تبص عليهم
قال يعني بتغطيهم
وعينيك مليانة شرار
والفعل فعل شيطان
قالت جوازه تحميهم
من كلام الناس
وماعرفتش اللى فيها
إنك واحد بصباص
واحسن من ضل حيطه
زي مافى الأمثال

أتاري الحيطه أرحم
من زي ده الهلاس
عشان مافيهش فايدة
واحسن منه المداس
وعمر الديابة ماتبقى
على الغنم حراس

....

ابقى قابلنى

ياللى رفضت الخوخ ترضى به

جالك يوم تتمنى شرابه

واللي بيرفض خير على بابه

يبقى الذل يا ناس أولى به

اشرب مرك واسكت عيش

أحسن بكرة ماتلقى العيش

بعد ماكنت تعيش متهني

كنت فاكرها الدنيا ح تحلى

صبحت روبه وزى الوحلة

بكره تقول ولا يومك ياللى

كنا معاك بالمش نحلي

ناس بتموت مش لاقيه القوت

وخلق ياناس بالتخمة تولي

لوفاكريوم كان عدّى يعود
ابقى تعالى ياخويا قابلني
بس اسمحلي اقولك فكره
برضو اليوم أحسن من بكرة
بيضيع الخير ويّا الأيام
زيّ الخيط واتكر ف بكرة

....

في الحرم المكي

متجمعين في الحرم المكي

صاحبه ويّا رسول الله

يشفع لنا في الآخرة نبينا

ف الجنة ندعي نكون ويّا

كل أماننا ننهي أجالنا

نعمل صالح يرضي الله

وصاحبه ويّا رسول الله

....

نبقى صاحبه ويّا نبينا

و لا يوم ينفع مال ولا جاه

في الآخرة هانجنى عمل الدنيا

واللي ها يعمل خير يلاقاه

واللي يقدم شئ راح يلقي

عمله قصاده بيستناه

وصحبه ويّا رسول الله

....

ياللي الدنيا واخدها مطية

وحياتك ماشية نمطية

اللي يقولك صلي وزكي

تقوله انا طيب حسن النية

تعمل إيه النية الحسنة

لو ماتأدى فرض الله

ونبقى صحبة ف طاعة الله

....

ياما ناس قالوا بكره نصلي

ونداوم ع الطاعة تملي

ومين يضمن من عمره الثانية

لما سنين يوعد ولايوفي

بالذنب يروح وها ياخذه معاه

ياريته كان على طاعة الله

عشان يشفع له رسول الله

....

زواج مثليين

يعني ضاقت ببيك الدنيا

تقولي زواج المثليين !

دا الحيوان مايفكر فيها

ولاحتى أفعال شياطين

إنت راجل ولاحرمة

ولّا مخنس بين لاتنين

احذر غضب الرب يامجرم

لما المثل يعاشر مثله

نبقى نقول ع الدنيا سلام

طبيعة الكون ربنا نظمّها

تيجى انت بجهل تغيرها

السما راح تهتز بجرمك

لولا الرحمة لزال الكون

مش عزبة بابا

ياللى بتسعى ف بلدي فساد

وَلَا بتضرب.....الاقتصاد

ضربة تشلّ إيديك الاتنين

تصبح عبرهللعباد

إياك تاخذ شئ مش حقك

لوخردله ح يحاسبك ربك

لوكنت فاكرها ياخويا وسية

ماهياش عزبة أبوك ولا عمك

كفك أصله مالوهش جيوب

وعملك كله مشين وعيوب

أصل الدنيا دي مش دائمة لك

قبل الآخرة لابد تتوب

....

فى سيدنا الحسين

باعشق ترابك

ونسمة هواكي

وروحى تفارقنى

لو ابعء بعيد

ياخذنى حينى

لخان الخليلى

وسيدنا الحسين

والسهرة هاتحلى

ف مقامك ياطاهرة

واحشنا الحكاوي

وشاي "الفيشاوي"

وطعمه ف لساني

ها يفضل سنين

وكان من حلاوته
بنطلب دورين
لو احنا تعبنا
من كتر طوفنا
نعود لحبيبنا
لجنب المقام
نكبر نعلي .. فيه ركعتين
الأرض المباركه
ومهد النبوه
يا مصر ياقاهره
لكل العدا
ربى ذكرها
واللى دعا لها
جد الحسين
فاكر يافندى

شیخ نقشبندی

صوته یجلجل قبل الآدان

نسمع له مره

ومره طوبار

ولو كنت غاوي

تسمع غناوي

كلام "الفاجومي"

والشيخ إمام

وكالة يا "غوري"

تحاكي تاريخنا

العريق من زمان

علم وثقافة

وحضاره وآمان

....

جَوَّه القلب

الذكرى الثلاثين لوالدي " رحمه الله "

رحمة ربي وألفين رحمة

رحمة ربي عليك

زى ماربنا وصّى بأمرى

برضو وصّى عليك

ياما شقيت وتعبت عشاننا

ما ف مره تعبت و كُليت

جَوَّه القلب مكانك دايمًا

مهما ان روحت هناك أو جيت

كنت قَرِيب من ربك دايمًا

في حياتك صومت وصليت

ياما عطف ع المساكين..

فى السر وخبيت

أيها مال في إيدك أو جيبك

أبدًا عمره ما بيكون ليك

قاري و حافظ لكتاب ربك

على نهجه اتوفيت

"ال عمران" أية التوحيد

فضلت تقول وتعيد

غبت بو عيك بره الدنيا

وللشهادة.... مانسيت

رحمة ربى عليك ياوالدى

رحمة ربى عليك

مترين شاش

والله الدنيا مادايمة لحد

مهما ها تكبرولا ها تعلّى

مسيرك يوم تتحط ف لحد

إحسن عملك

حطه ف كفنك

يومها ماحد بينفع حد

أعبد ربك واخلص عملك

قبل ما باب التوبه يتسد

أوعى غرورك ياخذك منك

تبقى يا عيني روحت بلاش

دا الانسان بالكلمه الحلوه

يحيا كريمًا طول ما ان عاش

لو يتعالى قوله تعالى

إعرف نفسك وماتنساش
إنت ف أصلك مِيَّه وطين
أخرك قطنه ومترين شاش
هوه الطين دا بيبقى له قيمه
ان زل ياناس ينداس بمداس
لكن الطيبه تعلّى صاحبها
وبالأخلاق ينشال ع الراس

....

العصفوره

كان فيه عصفوره صغيره

تتنط وتتلعب بالكورة

تاكل حبه .. تنط النطه

علشان عصفوره صغيره

...

عصفوره بتصحى الفجريه

وصحيت على صوتها الصبحيه

وكتير بتطير وتغنى لنا

علشان عصفوره صغيره

...

بتسبح للرب كريم

علمها من غير تعليم

خالقها وناشيها

ما بين الخلاق
ولا يوم ناسيها
من الرزق رازق
علشان عصفوره صغيوره

....

لما كانت اللحمه رخيصة

إياك وأن تأكل لحمه
و لبطن سيادتك تستحلى
المئة جنيهه ف كيلو واحد
لايكفى غدوه ولا عشوه
إياك وأن تأكل لحمه

....

مالها البصارة والبول
دى حتى سعرها معقول
العشره بحق كيلو واحد
وأحسن ميت مره من اللحمه
إياك وأن تأكل لحمه

....

طب ماله النابت بالدقه

بالخل والتوم ع الفتة
ومراتى بتعملها بدقه
والريحه بتملالى الشقه
والطعم ألد من اللحمه
إياك وأن تأكل لحمه

....

عيالك ان جم طلبوها
أو مروا بجزاروشافوها
أو بالصدفة ف يوم عرفوها
أو عند جيرانك شموها
قل يابنى اللحمه ماليا لازمه
إياك وأن تأكل لحمه

....

بالفول الصويا أهو غشوها
حتى الحمير ما عتقوها

أخذوها على غره وذبحوها

ومنها كباب أو نيفه

والكفتة ع الفحم شووها

والناس تأكلها بشراهه

لاتبالي أمراض ولاعدوى

إيالك وأن تأكل لحمه

....

على فرض صحيح إنها لحمه

ضاني وبتلو ماهيش بغله

راح تبقى ثقيله على المعده

وتجيب النقرس والتخمه

إياك وأن تأكل لحمه

....

و ليه أعيش العيشه البشاواتي

وأنا راجل على قد حالاتي

والجاي مش قد الريحات
وأكفى منين أنا يا اخواتي
ومنين راح أجيب حق اللحمه
مابلها ياناس ناكل لحمه

....

ولا أقدر از علك

بحبك وأعشقك

ولا أقدر از علك

ولو مره ز علت منى

أنابرضو مش ملك

ما اقدرش از علك

....

تغيب عنى وتتقل

وأدور عليك وأسأل

مأنت الوحيد يا حبى

الى لقلبى امتلك

ما أقدرش از علك

....

إنت بس اللى ليا

لكن يصعب عليا
منك كتر الأسيه
ولما ترضى عنى
ف لحظه بتلاقينى
ف يمينك ملك لك
ما اقدر شي أزعلك

....

شهر الرحمة

يا شهر الرحمة اشتقتناك

اشتقتنا اشتقتنا اشتقتنا لك

بتغيب وتعود بالخير لنا

ما أحلى صيامك وقيامك

كل أما تعود الخير بيزيد

لجل الغفران نستناك

يا شهر الرحمة اشتقتناك

....

بتملى الدنيا بأنوارك

وسعادة الناس من أسرارك

ياريت على طول تبقى معنا

وتحل علينا ببركاتك

فرحت كبارنا وصغارنا

وعبيرم الجنه بنسماتك

ياشهرالرحمه اشتقتنا لك

....

صلاه وصيام .. قرآن وقيام

ذكر وتسبيح موسم طاعه

أفراح وعزايم متبادلله

وصلاة التراويح في جماعه

وولاد فرحانه هناك وهنا

وصيام ويانا ساعه بساعه

وياشهرالرحمه فرحنا بك

واشتقتنا لك اشتقتنا لك

....

بشر وملاك

ف الأصل بشر

والطبع ملاك

والشكل قمر

وازاي أنساك

مشتاق للسمر

والقعدة معاك

لوقلبك حجر

ح اتمنى رضاك

أنا قلبي انفطر

وما حب سواك

أه لو تفكر

زمان وياك

ياما كنت انتظر

ضله ف سماك

لوتحت المطر

سنه ها استناك

دا العمر سفر

ولا أرضى سواك

إن كان ده قدر

أنا كلي فداك

....

رَبِّ الْعِبَاد

زَيِّ مَاقَالَ رَبِّ الْعِبَاد
اصْلَحُوا وَبَلِّغُوا فُسَادَ
تَزْرَعُ خَيْرَ بَكْرِهِ تَلَاقِيهِ
وَيُورِثُوهَ بَعْدَكَ أَحْفَادَ
تَعِيشُ حَيَاتَكَ تَسْعُدُ بِهِ
وَيَبْقَى فِ الْآخِرَةِ لَكَ زَادَ
زَيِّ مَاقَالَ رَبِّ الْعِبَاد

....

إِيَّاكَ تَغْدُرُ .. إِيَّاعَكَ تَظْلُمُ
وَاحْذَرْتَ أَكْلَ حَقِّ النَّاسِ
إِيَّاعَكَ تَأْخُذُكَ مَرَّةَ الدُّنْيَا
وَيَغْرُكَ وَسْوَاسُ خَنَاسِ
عَمَلُكَ مَكْتُوبٌ وَتَمَلِّي عَلَيْكَ

ف سجلك ليوم الميعاد

زيّ ما قال رب العباد

....

حاسب نفسك وبلاش غيرك

واعلم انه رقيب معبود

ارضي ربك وارضي ضميرك

ح تبقى وسط الناس محمود

وكل شئ مكتوب بميعاد

زيّ ما قال رب العباد

....

مهما هاتتعب ولا ها تسعى

رزقك ده بمقدار محدود

أصل الرزق ماهوش بشطاره

ونصيبك جاهز موجود

اقتع تتهنى بحياتك

وتعيش في غاية الإسعاد

زيّ ما قال رب العباد

....

صاحبى

صاحبى يا خراط معادن

عايزك تصنعلى قلب

مخروط على اسطمبه

معمول بدقه وفن

مايكونش فيه غاطه

شغله يكون ع الرايق

لاغش فيه ولا أونطه

والخامه تكون م الصلب

متأثرش فيه بُنطه

ولا صدمة لحام كهربا

ولا طرق ع السندان

ولا لسعة لسان حاده

ويكون وريد صادق

يتحمل قساوة ناس

كتير بتظلم بعض

ملحك وعيش ياكلوه

لا حفظوا ولا صانوه

ان اشتريتهم غالى

بالرخيص يبيعوك

تسعد ف يوم فرحهم

يتفننوا يبيگوك

لوقيدت ايدك شمع

مايوم تكون عاجب

لناس ماتعرف حق

ولا تحفظ الواجب

لو كل الناس كده

ماتأخذش م البشر صاحب

غلطان ياللي تقول

أصل العين عمرها
ما تعلّى على الحاجب

....

قهوه زياده

قهوه ومنور فنجانها
غريبة الطعم وألوانها
لو الدنيا تخلف مواعيدها
بتجيني القهوة في أوانها
السادة سكرها زياده
بالاقيها دايمًا كالعاده
م الإيد اللي بتطرح سكر
مظبوطه ولا أعلى إجاده
اتعودت عليكى يا قهوة
اكنك معموله بفن
لو عدّى يوم جاني بسهوة
يتشتت عقلى ويجن
لو أفكريوم ما شربها شى

يرجع قلبي يلين ويحنّ
صباح القهوة بسكرزاد
خلاني أعلق بيها
بتخليني أنسى الزاد
بس قوليلي السر فيها
وجبتها من أيها حاوى
ولا السحر اللي حاويها
أكيد إيدك ساحراها
وطلاسمها انت تحليها
وتحليها

....

أنا أمكم

أنا شمسكم أنا ضلُّكم

أنا أمكم

شمس الدفا ف يوم بردكم

شجرة حنان بضلّها

يوم حركم

كل ما اقرب ليه تبعدونى

من غير سبب كده بتبيعونى

إيه اللي غير طبعكم أنا أمكم

....

ريبتكوا وف عز التعب

ماهونتوش عليا

والقلب كان بيضمكم

ورموش عينيا

ياما كنت انوح بالالام

من بلوتي

ولا كنت أبوح بالكلام

ولا شكوتي

والنظره ف عيونكم

حبابي تهون عليا

ايه اللي غير طبعكم ده انا أمكم

....

شبابي راح وعمرى ضاع

من أجلكم

ولا شوفت يوم فرحت بيه

في قربكم

كان نفسي في حبة حنان

اوحتى كلمه طيبه

طالت الحياه أوقصرت

ما الدنيا فانيه قريبه
وها تعرفوا قيمة أمكم
ايه اللي غير طبعكم أنا امكم

....

شوفتوا الوحوش
إزاي تحوش عن أمها
من أي شئ
لو جت أذيه تمسّها
يفدوا بحياتهم أيّ شئ ها يضرها
ومين ياناس حط الحنان في قلبها
وانتوا مين اللي يقسي قلبكم
ايه اللي غير طبعكم على امكم

....

وانا وسطكم كتبتوا ليه
شهادة الوفاء

بتموتونى وانا لسه
على قيد الحياه
ياريت ابوكم لما مات
خدنى معاه
ولا شوفت قسوة قلبكم
ولا اللي غير طبعكم على أمكم

....

ليهم رب

ودّع في أهله وعارف
انه خلاص مش راجع تاني
باس ف ولاده واحد واحد
بس ساعتها سلامه بكاني
لمعه ف عينه فوقها الحسره
أمانه يابا إياك تنساني
دولا ولادي أمانه ف إيدك
لسه صغار محتاجه حناني
لومكتوب لى يابويا شهاده
حتما ربي يكون زكاني
أيها مؤمن مخلص وطني
أكيد يتمنى يكون ف مكاني
جنة و حور و ملايكة ربي

من دلوقتي بتستتاني
روح ياوليدى وكون مطمئن
ان الرحمن مش ح يسيبنا
أنا وولادك راح يوهبنا
وانت اطمئن يا حبيب قلبي
كلنا يا بنى ليهم أب
ربك هو اللى بيحميهم
أهلك شاي لينهم فى عنيتهم
وانت اتوكل على مولاك
روح دى الجنة بتستتناك
واحنا رضىنا خلاص بنصيبنا
أيوه رضىنا بحكم الرب

.....

نصيحة أب

اسمعى يابنتى

وانت مقبله

على بيت جوازك

ولبيتنا مدبره

أنا عارف انك

شاطره مدبره

واجهى ببساطه

أى مشكله

وان حصل خلاف

ما تقولىش لحد

وان حبوكى عشره

عكسهم الاف

يبقى الحل بينكم

بالحب والإتلاف
حماتك زى ماما
وحماتي زى أب
تكسبي رضاهم
بالوداد والحب
واللي ماسأل عنك
اسألني عليه
تملكي عريسك
ويحطك ف عيني
وتكوني طايعة لجوزك
مادام في طاعة الله
عشان طاعته واجبه
من بعد الإله

....

وانت ياواخذ مني

زينة الحياة
أوصيك تعاملها
بما يرضي الله
زيّ ما قالوا اسيادنا
يكرمهم كريم
ويظلمهم لئيم
وأنا عارف انك
جد ومستقيم
إسراء أمانه يا احمد
حطها ف عينيك
تحافظ عليها
تسعدّها وترضيها
تحطّك ف عينيها
وتحافظ عليك
من أيّ نسمة طائره

وتبقى لكم ذريه
صالحه فى طاعة الله
وعلى بركة الله

....

إلى ست الحبايب

لجلك اخضرت الدنيا
وليكي غنى الربيع
مستحيل استغنى عنك
وكانني طفل رضيع
لوجابولي كنوز الدنيا
بيكي انت مش هابيع
الكنوز ف يوم بتفنى
وحبك انتي محال يضيع
ولو زعلتي ف لحظه منى
يبقى من غيرك أضيع
ده برضاكي الدنيا تحلى
ويبتسم الروض البديع
وبدعاكي ياملاكي

من الأهوال حجاب منيع

تسلمي لنا وتعيشي لنا

يبقى العمر علينا ربيع

....

يا مصطفى

يا مصطفى يا مصطفى

نورت الدنيا يا أبيها

النور يشوفك ينطفئ

يا مصطفى

نورت حياتنا كلها

وضحكه مافيش ف زيهـا

تجرى لتيته تشدها

عايز تبوسها ف خدها

ومين ف الفرحة قدها

لما مصطفى يحبها

يا مصطفى

تشاور لجدو من بعيد

لما يجيب لعب كتير

وقطر كمان سكه حديد
يمشي بحماس.. يضرب نفير
يطير م الفرحة مصطفى
يامصطفى
تورته وشموع في قلبها
صورتك جميله ف وسطها
وزينات كثير متعلقه
عازم صحابك كلهم
فرحوا بميلادك السعيد
غنوا وقالوا مصطفى
يعيش ويكبر مصطفى
يامصطفى

لجنة الإمتحان

فى لجنة الإمتحان

شكا الكراس م القلم

واللى ماسكينه

كلامكم اللى اكتب

انتو غاشينه

ضميركوا ان كان عاش

ولا فى الإنعاش

ولا على باب اللجنه سايبينه

زى قتيل اتقتل

بايده وسكاكينه

بكره الفساد ان زاد

يبقى انتوا اللى زارعينه

مين ياواد علمك

الغش والإختلاس
وبكره ازاي تكون
مسؤل تقود الناس
يعنى نواة مرتشى
وعمرك ما تختشى
ولا عندك ف يوم إحساس
قولي مين غششك
وباع لك الامتحان
هو ابوك علمك
ولا صاحبت شيطان
ازاي تكون مسؤل
بالغش والتدليس
واول فساد زرعك
بالغش في الكرايس
لو الامتحان اتباع

ومجهود زمايلك ضاع
ح يقاسي كثير الوطن
منكم وم الأوضاع
ليه تكون غشاش
جاهل كده بخيبه
و يشتروك ببلاش
بجهل مش طيبه
لو الوطن اتسرق
يبقى انتوا اللي سارقينه
ولو تفرط فيه
يبقى انتو اللي بايعينه
خربت ياناس الزمم
ماعدش فيها أمان
معايا يالا قولوا
ع الدنيا ألف سلا

خدوا المعاش

خدوا المعاش وأكلوني

أنا والوليه والبنيتين

عشان معاشي تخیلوا

بقى تسعمايه الا ثلاثين

نصهم فى الميّه ونور

وباقى الشهر ناكل بالدين

وبعدها حنسد منين

خدوا المعاش

بعد المعاش انا صحتى راحت

لا تتفع فى صنعه ولا تاجرّه

أنا لو شايف شئ يناسب لى

كنت أنزل له من بكره

ولا كنت أكل أنا بالدين

ولا اذل نفسى بكلمتين
بسبب المعاش
قالوا فى المعاش ترتاح
أتاري الهم زاد قلبى
مراتي اهي زعلت مني
ورايحة تطفش وتسيبني
طلبات بيتي منين اجيبها
حياتى اتلقبت بسببها
أجيبها شمال واجيبها يمين
حد ياناس يجي يحسبها
وياخذ المعاش
خدوا المعاش أنا نفسي أعيش
زى بقيت الخلق ما عايشه
ليه تخلصونا نمد الإيد
يعنى حكومه خلاص مش شايفه

الاعدام اهون يا اخونا
من معيشة الذل البائسة
بسبب المعاش
خدوا المعاش وريحوني
بدل ما أروح واتعب واقبضهم
شافني واحد سواق توك تك
باعدهم واحسب واكتبهم
مد ايديه قال يسندني
اكنى داىخ وما أقعشى
قولت صحيح الدنيا بخير
وبصراحه أنا قلبى أكنى
قام راح ف غفلة ولهفهم
وجري بالمعاش
بعد المعاش أنا ناوي أطفش
واسيب لكوا الدنيا وامشي

بس بلاش حد يقولي
ان بايدي خراب عشي
طَب ما العش انتوا خربتوه
والمعاش انتوا قصفتوه
حتخلوني ارقع بالصوت
ولاياناس أطم وشي
لولا حرام الطم وشي
بسبب المعاش

.....

أنصح فلاح

(مفتتح)

فلاحنا دا أنصح فلاح

و حَدَاهُ الْخَيْرُ إِنْ غَدَا أَوْ رَاحَ

دِهْ مَرِهْ صَحِي فِي الصَّبْحِيهْ

قَامَ جِتْ لَهُ فِكْرُهُ انْمَا هِيَّهْ

وَلَا عَمْرُهَا مَا تَخَرَّ الْمِيَّهْ

قَالَ اَيْدِيْ فِ اَيْدِيْكَ يَاوَلِيَّهْ

وَنَقَبَّ عَلَى وَشِّ الدُّنْيَا

اَمْشِيْ وَرَايَا وَهَاوَدِيْنِيْ

وَايَاكِيْ فِ مَرِهْ تَعَارُضِيْنِيْ

....

أنصح فلاح

بيعى الكردان ياويليه
والقيراطين اللي حيليتنا
ياللا بنا على بنك القرية
ويبقى دقيقنا فوق زيتنا
وهايجي الدنيا على هوانا
نبقى أنا وانتى حاجة تانية
نعمل إذاعة قروية
ونسَمع الناس إذاعتنا
فشرالقتوات الدولية
ونطلق الفقر بإيدنا
وان لعب الحظ شوية
ننزل على مصرأم الدنيا
وأى حاجة نجيب منها

بسعر العملة العالمية
وان اتزنفتنا احنا ف قرشين
النقد هايدينا السلفه
بضمان سمعتنا الوردية
وصيتنا تسمع به الدنيا
وشيخ البلد يجي حدانا
والعمدة هانحطه ف جيبنا
ونصرف كيماوى بالتقسيت
ونغلي الأسعار على كيفنا
والي مايدفع قسط عليه
نحجز عليه وناخذ أرضه
واجيب كارتته موديل حديث
تحلف بها كل العزبه
وع الهويس ادق طرمبه
وآخذ م الناس حق الميّه

والهوا ييجي في الخطه
وع المناخير نصرف عداد
يعد الأنفاس بالشّمّه
وح اعمل ترعه دور ثاني
والميّّه تطلع في العالي
و اخذ م العمده العموديه
والطبالين يشرحوا حالي
هما أدري الناس بيا
وعينيا طبعا هاراضيه
وانتوا بقى الخطه الجايه
وان زهقتوا اوي تموتوا
وصبروا روحكوا شويه
وان موتوا بقلبي احييكم
والكفن مني هديه
أنا سامع حد بيسألني

امتى بقى الخطه الجايه

أسرع م البرق هاتيحي

سنة ألفين وستمايه

وابقى قابلى إنت وهى

....

شوية حظ

إدينى شوية حظ

وأنا اقول للدنيا دي طز

علشان دايمًا ملعونه

وبتتعب ف اللي جابونا

وساعات بتكون مجنونه

ولا شوفناش منها العز

إدينى شوية حظ

بتروح دايمًا لاصحابها

وبتدي للي عاجبها

دايمًا بتعلي الواطي

عايزانا ليها نطايطي

وأنا معرفش التطبيل

ولا برقص لها بصاجات

ولا يعرف وسطي الهز

إديني شوية حظ

عارفين هي بصراحه

ماتخلي حد ف راحه

سكاكينها دي الدباحه

بتلاقي حد ف ورطه

ف رقبتة تدوس وتجزّ

ومادام طبعها ويانا

الغدر مع الخيانه

من حقى أقول لها طز

ولا عايز منها العز

....

الشاعر في سطور

الاسم/ محمد محمود عبدالعال فارس

الشهرة/ محمد فارس أبوعمار

مواليد/ 1954 فى حى بولاق القاهرة

من عائلات فارس ببني عدى

المؤهل/معهد اعداد الدعاة

عضو / رابطة الزجالين وكتاب الأغاني

عضو/نادى أدب السلام القاهرة

عضو/نادى أدب القلج قليوب

عضو/جمعية أصدقاء سيد درويش للتراث

عضو/مؤسس نقابة العاملين بمجال الشعر(تحت التأسيس)

محرر بمجلة اشراقة سابقا

محاضر ومحكم فى بعض المسابقات فى مؤسسة بنت الحجاز

ناشر فى مجلة عبير الزهور

ناشر فى مجلة إشراقة

ناشر فى مجلة نقابة العاملين بمجال الشعر(تحت التأسيس)

قدمت نص غنائى (أطفال) للاذاعة وافقت عليه اللجنة
لبرامج الأطفال

شاركت فى ديوان نبض الشعراء بالنقابة سابق ذكرها

حاصل على المركز الثالث فى الشعر من النقابة

حاصل على شهادات التقدير والجوائز من المشاركات
بالمصالونات الأدبية والندوات الشهرية

الفهرس

م	القصيدة	الصفحة
1	بطاقة الكتاب	2
2	الإهداء	3
3	ذنبه إيه	4
4	عريس لقطة	7
5	سي روميو	11
6	آخر صيحة	14
7	يا أميرة	17
8	إنت مين	21
9	حكم الست	23
10	رسالة شهيد	25
11	رنة تليفون	29
12	جواز اضطراري	32
13	ابقى قابلني	35
14	في الحرم المكي	37
15	زواج مثليين	40
16	مش عزبة بابا	41
17	في سيدنا الحسين	42
18	الله يرحمك يابا	45
19	مترين شاش	47
20	العصفورة	49

21	لما كانت اللحمة رخيصة	51
22	ولا أقدر أزعلك	55
23	شهر الرحمة	57
24	بشر وملاك	59
25	رب العباد	61
26	صاحبي	64
27	قهوة زيادة	67
28	أنا أمكم	69
29	ليهم رب	73
30	نصيحة أب	75
31	إلى ست الحبايب	79
32	يامصطفى	81
33	لجنة الإمتحان	83
34	خدوا المعاش	86
35	أنصح فلاح	90
36	شوية حظ	95
37	الشاعر في سطور	97
38	الفهرس	99